

30.10.2020



ISSN (E) - 2184-1334

**“ILM-FAN VA TA’LIMDA INNOVATSION YONDASHUVLAR,
MUAMMOLAR, TAKLIF VA YECHIMLAR”**




**ONLINE
CONFERENCE**



**KO’P TARMOQLI 5-SONLI RESPUBLIKA
ILMIY-ONLAYN**

KONFERENSIYASI



WWW.ACADEMIASCIENCE.UZ

ICJ JOURNALS
MASTER LIST

**Ўрта Осиё мусулмонларининг ҳаж зиёрати
(1917-1990 йиллар)**

**Айтматова Зарингор Гуломовна
БухДУ Жаҳон тарихи кафедраси ўқитувчиси**

Мустақилликдан кейин Ўзбекистонда динга бўлган муносабат тубдан ўзгарди. Мустақиллик шарофати билан ҳамюртларимиз ҳажга ва Умрага-Макка ва Мадина зиёратига, диний фарзни адо қилишга бориб келмоқдалар.

Совет ҳокимияти ўрнатилгунга қадар Туркистон мусулмонларининг ҳаж зиёрати Россия империяси сиёсати билан узвий равишда боғлиқ бўлган. Бу Туркистон генерал – губернаторлиги, Бухоро амирлиги, Хива хонлиги, бутун Россия империясининг қўшни мамлакатлар, айниқса, Эрон Туркия, Афғонистон, Британия Ҳиндистони билан кўп томонлама муносабатларидан келиб чиққан. Иккинчидан, бу жараён иқтисодий омил билан ҳам узвий боғлиқ бўлиб, катта миқдордаги маблағ Шарқ мамлакатларига, асосан Саудия Арабистонига оқиб кетарди. Тўғри, Саудия Арабистони номи билан бир бутун давлат 1932 йилда ташкил топган, бироқ тарихий адабиётларда бу атама, бу санадан олдин қўлланилган. Ҳаж зиёратини адо этиб қайтган мусулмон вакиллари ахлоқий–маънавий дунёкарашида ўзгаришлар содир бўлиб, улар дунёни, ҳаётни бошқача идрок қила бошлаши ҳам муҳим аҳамиятга эга эди. Тадқиқотлар шуни кўрсатадики, Туркистон генерал – губернаторлиги даврида Макка ва Мадина ҳажига борувчилар сонни кўп эди. Россия империяси мусулмончилик билан ҳисоб- китоб қилишга мажбур бўлганди. Ҳар йили ўлкада 2-3 бор кўтарилган халқ кўзғолонлари империя маъмурларини эҳтиёткорлик билан сиёсат юритишга ундаган.

Диний эътиқод мутаассиблик, эскилик сарқити сифатида қараладиган бўлди деб ҳисобланади. Коммунистик мафкура ҳукмронлиги шароитида мусулмон аҳоли оғир турмуш шароитига тушиб қолди. Диний маросимларнинг тақиқлаб қўйилиши, мадраса ва масжидлар ёпилиши, ислом меъморий обидаларининг вайрон қилиниши, 1917 – 1924, 1925 – 1935- йиллардаги ҳарбий тўқнашувлар ўзбек халқи маънавий – маданий ривожига ўнглаб бўлмас зарбалар берди. Таъқиб ва тазйиқлар большевиклар томонидан диний уламоларга ҳам, мусулмон аҳолига ҳам ўтказилди. Мусулмон уйғониш даври моддий ва маънавий ёдгорликлари қаровсиз ҳолда қолиб, ярим хароба ҳолатига келтирилди. Ўрта Осиё халқлари тарихи ўрганилар экан, 1920 – 1930 йилларда Фарғона водийси, Бухоро ҳудудларидан айрим йилларда 2 – 3 киши ҳаж зиёратига борганлиги кузатилади. 1976-1992 йилларда мавжуд бўлган “Ватан” жамияти фаоли Аҳмадjon Лукмонов совет ҳокимияти йилларида ҳар йили

СССРдан ўртача 20 кишидан 30 кишига қадар мусулмонлар ҳаж зиёратига боришини таъкидланган. Ҳаж зиёрати учун Макка ва Мадинага амаллаб етиб олган бармоқ билан санарли шахсларнинг ҳам айримлари Ватанга қайтмасдан, у ёки бу Шарқ мамлакатларидан бирида яшаб қолишган. Уларнинг кўпчиликлари Туркия Республикасини иккинчи Ватан сифатида танлашарди. Собиқ зиёратчилар Туркия шаҳарларида савдо – тижорат ишлари, хунармандчилик, ҳамоллик ва бошқа хизматлар билан шуғулланишган. Иккинчи жаҳон уруши йилларида (1939 – 1945 йй.) совет ҳукумати динга муносабатда “юмшоқлик” йўлини тутди. Мақсад фашизмга қарши курашда диний уламолар ва мусулмон аҳолини ўз тарафида туриши оғир дамда жамият яқдиллигига эришиш эди. Қолаверса, СССР мусулмон мамлакатлари билан яқинлашган. 1943 йилдан диний расмий идоралар ташкил этилди. Тошкент, Уфа, Боку, Бўйноқда ҳудудлар бўйича мусулмон бошқармалари ташкил этилди. Жумладан, Ўрта Осиё мусулмонлари диния бошқармаси (кейинчалик Ўрта Осиё ва Қозоғистон мусулмонлари диний бошқармаси, Мовароуннаҳр мусулмонлари диний бошқармаси) тузилди. Мазкур диний бошқармага ва Ўзбекистон ССР ҳукумати Маориф нозирлиги ҳузуридаги “Диний ишлар қўмитаси” га ҳаж зиёратига бориш учун расман ариза беришга рухсат этилди. Ҳаж зиёратига бориш учун жуда кўп сунъий тўсиқлардан ўтиш керак эди. Шунинг учун зиёртачиларнинг йиллик ўртача сони, бармоқ билан санарли бўлиб қолаётган эди. 1944 йилда Совет Иттифоқидан ҳаж зиёратига борганлар сони 6 нафарни ташкил этди. 1953 йилда эса 23 киши Макка ва Мадина ҳажига бўлиб қайтган. 1944-1953 йилларда ҳар йили ўртача зиёратчи мусулмонлар сони 15 – 18 нафардан ошмаган. Зиёратга бориб қайтган мусулмонларнинг 50 – 60 фоизини Ўзбекистон мусулмонлари ташкил этган. Албатта, кўп миллионли СССР давлати аҳолиси учун юқорида кўрсатилган рақамлар ўша давр учун, аҳамиятсиз, номигагина ҳаж зиёратини амалга оширишга рухсат берилганлигини кўрсатади.

Совет ҳукумати органлари ҳаж зиёратига ариза берган шахсларни (фуқароларни) ижтимоий келиб чиқишига катта эътибор қаратарди. Зиёрат учун рухсат берилганларнинг асосий қисми диний уламолар, магазин мудирлари, қоровуллар эди. Ҳукумат аъзолари қоқоқлик ва мутаассибликда айбланишдан, эгаллаб турган мансабларидан ажралиб қолиш хавфидан қўрқиб, улар ҳаж зиёрати учун ариза беришмасди. Ҳаж зиёратидан қайтган кишиларга ҳожи ош бериш, хатм – қуръон қилиш, ўзини билдириш амалда таъқиқланган. Номигагина ишлаб турган 2-3 мадраса ва масжитларнинг хизматчилари ҳаж зиёратига кетадиганлар умумий рўйхатга киритилардилар. Аслида ҳаж зиёрати истагини билдирганлар ва ҳукумат органларига ариза билан мурожаат қилганлар аслида кўп сонли бўларди. Мусулмон аҳоли ҳар

кандай тўсиқ, тақиқларга қарамай ариза беришда давом этаверган. 1961 йилда Макка ва Мадина ҳаж зиёратига бориш истаги билан 100 нафар мусулмон (Ўзбекистондан) мурожаат қилган. Узоқ текширувлардан кейин фақат 6 нафар мусулмонга ҳаж зиёрати учун рухсат берилган. Ҳаж зиёратига юбориш мусулмонларнинг Диния Бошқармаси ихтиёрида эмасди, бу жараён ҳукумат ва СССР Давлат Хавфсизлиги (КГБ) идораси томонидан назорат қилинарди. Мусулмончилик қондаларини бажариш билан боғлиқ ишлар 1970 – йиллар охири – 1980 – йилларда янада қатъий таъқиб остига олинди. Ўзбек халқи учун асрлар бўйи яшаб келган урф–одат ва анъаналар қолоқлик, диний мутаассиблик кўринишлари қолдиқлари сифатида қораланди ва амалда тақиқлаб қўйилди. Рўза ҳайити, Қурбон Ҳайити байрамлари нишонланмас, ҳатто, “Наврўз” ҳам диний байрам деб эълон қилинди.

1980 – йиллар бошида мусулмон одат ва маросимлари тақиқланди, ҳатто жаноза маросимлари ҳам ўтказилмай қўйилди. Айниқса, компартия аъзолари ва ҳукумат раҳбарлари ўзларини яқинлари жанозасига ҳам боролмай қолди. Зўровонлик йўли билан мусулмон урф–одатлари тақиқланиши ҳаж зиёратига ўзининг салбий таъсирини кўрсатди. Тарихий маълумотлар шуни кўрсатадики, 1960 – 1980 – йилларда ҳар йили ўртача 25 – 38 нафар мусулмон зиёратчи Макка ва Мадина ҳажда бўлиб қайтган ҳолос. Ҳаж зиёратига бўлган аҳоли орасига “махсус хизмат” вакиллари киритилиб, улар қатъий жадвал асосида зиёрат арконларини бажаришар эди. Шунингдек, зиёратчиларнинг асосий қисмини диний муассаса ва диний ташкилотларда фаолият юритганлар ташкил этганлигини тарихий далиллар тасдиқлайди. Ҳукумат сиёсатида мафкуравий куч ва таъсир ўтказишдан ҳимояланиш мусулмон аҳоли учун кўплаб кийинчилик ва руҳий азобларни юзага келтирганди.

Хуллас, совет ҳокимияти йилларида Собиқ Иттифок, жумладан, Ўзбекистондаги мусулмонларнинг муқаддас шаҳарлар: Макка ва Мадинага ҳаж зиёратини бутунлай тақиқлаб қўйилмаслик мақсади жаҳон жамоатчилиги кўзи олдида СССРни эркин ва озод халқлар иттифоқи қилиб кўрсатишга қаратилган эди. Совет ҳукумати ислом динига, мусулмон аҳоли ва дин уламоларига нисбатан муносабатда Россия империясидан ҳам бир неча қарра ортиқ салбий муносабатда бўлганди. Туркистон Россия империяси таъсирида бўлган йилларда мусулмон зиёратчилар сони ҳар йили 5 – 7 минг нафар атрофида бўлса, совет ҳокимияти йилларида уларнинг сони бир йилда бир неча ўн кишидан ошмаганлиги юқоридаги фикримизни исботлайди.